

do, que de ende al que vos la mostrare testimonio signado con su signo porque yo sepa en como conplides mi mandado.

Dada en la çibdat de Toledo, veynte e syete días de febrero, año del nascimiento del nuestro Saluador Jhesuchristo de mill e quatroçientos e veynte e dos años.

Va escripto entre renglones en la segunda foja, o diz con condiçion, e en la quarta foja, o diz e ponga, e en la V foja, o diz en las dichas vendidas, e o diz dia, e o diz que las dichas vendidas, e o diz e mercados, e ferias, e otras qualesquier villas e lugares franqueados, e en la sesta foja, o diz de fianças, e en la nouena foja, o diz e en tanto que yo mando por mis cartas ordenar la ley, e en la dezima foja, o diz o recabdador, e o diz no, e o diz los, e o diz o fueren, e o diz alcaldes, e o diz por el mi arendador o se asentare en los mis libros de los mis contadores, e eso mesmo fuere obligada, e o diz luego. E va escripto sobre raydo en la primera foja, o diz puertos, e en la terçera foja, o diz mill, e en la quarta foja, o diz la dicha, e en la quinta foja, o diz trezientos, e en la sesta foja, o diz otro, e o diz a mi, e en la VII foja, o diz puja, e o diz demas, e en la VIII foja, o diz arienda, e e la nouena foja, o diz paga, e o diz contadores asy descontaren al, e o diz vendiçion, e diz poderosa, e o diz que sean tenudos, e o diz arendadores, e en la dezema foja, o diz que ellos libraren, e o diz reçebir, e o diz el recabdador de aquel año mesmo que la dicha fiança.

Yo Juan Garçia de Valençia, escriuano de nuestro señor el rey, lo fiz escreuir por su mandado, Pero Ferrandes, Sancho Ferrandes, Juan Garçia, Pero Ferrandes, Pero Roys.

[1422]-III-26. Toledo.—*Juan II manda al concejo de Murcia que le envíen el caballo mayor de los tres que tiene Domingo Vicente.* (A.M.M., Cart. 1411-29, fol. 143v.)

Yo el rey, enbio saludar a vos el conçejo, e alcaldes, e regidores, caualleros, e escuderos, e ofiçiales, e omes buenos de la çibdat de Murçia como aquellos de quien fio.

Fago vos saber que al presente en mi caualleriza no ay cauалlos quales cunplan a mi seruiçio, e porque yo he seydo enformado que Domingo Viçente, vezino desa çibdat, tiene tres cauалlos buenos, por ende vos ruego si plazer e seruiçio me auedes de fazer que me enbiedes luego el cauалlo mayor dellos, en lo qual vos ruego que no pongades escusa ni luenga alguna, e mandedes al que lo troxiere que enel camino ponga enel tal guarda por manera que no venga malparado çertificando vos que enello me faredes plazer e seruiçio singular.



Dada en la muy noble çibdat de Toledo, veynte e seys dias de março. Yo el rey. Yo Martyn Gonçales la fiz escreuir por mandado de nuestro señor el rey.

1422-III-29. Escalona.—*Juan II manda a los alcaldes mayores de Sevilla que entreguen a la ciudad de Toledo un traslado de los privilegios que tienen los jurados.* (A.M.M., Caja 1, núm. 5.)

Don Johan por la graçia de Dios rey de Castilla, de Leon, de Toledo, de Gallizia, de Seuilla, de Cordoua, de Murçia, de Jahen, del Algarbe, de Aljezira, e señor de Vizcaya, e de Molina. A los mis alcalldes mayores, e alguaziles, e veynte e quatro caualleros jurados de la muy noble çibdat de Seuilla, e a qualquier o qualesquier de vos a quien esta mi carta fuere mostrada, salud e graçia.

Sepades que yo entiendo que cunple ansy a mi seruiçio e axecucion de la mi justiçia, e a bien, e paz, e sosyego de la muy noble çibdat de Toledo fize e hordene enella nueuamente çiertos jurados, los quales mande que usasen de los dichos ofiçios de juraderias e los administrasen e ouiesen segund e por la forma e manera e horden que auedes los dichos ofiçios de juraderias vos los dichos jurados desa dicha çibdat de Seuilla e con estas mismas cartas e preuillejos, e franquezas, e libertades, e poderio, e usos, e costumbres.

Porque vos mando que luego vista esta mi carta mostredes vos o qualquier de vos en cuyo poder estouieren todas las cartas, e preuillejos, e hordenamientos, e poderios, e franquezas que auedes e tenedes en razon de los dichos ofiçios de juraderias de los reyes onde yo vengo e de cada uno dellos, e de mi ansy en razon de lo que toca e pertenesçe a los dichos ofiçios e a la carga dellos como de los salarios que por los dichos ofiçios han de auer e de las franquezas, e libertades, e preuillejos que por razon de los dichos ofiçios han de auer, los quales mostredes ante qualquier de los dichos mis alcalldes desa dicha çibdat a los que le mando que vos apremien a ello ansy mostrado que de todo ello fagades e fagan sacar traslado autorizado en forma en manera que faga fe, e lo fagades e fagan dar sygnado de escriuano publico por quien pasare al jurado Pedro de Baeça, secretario del mi muy caro primo infante don Juan que alla enbian por ello los dichos mis jurados de la dicha çibdat de Toledo pagando el dicho jurado Pedro de Baeça a los escriuanos por quien pasare su justo salario que por ello ayan de auer porque los dichos mis jurados por ello puedan ser e sean auisados e çertificados de las cosas que a ellos pertenesçen fazer por razon de los dichos sus ofiçios e las puedan fazer e fagan segund cunple a mi seruiçio e a esecucion de la mi justiçia, e a bien, e pro comun de la dicha çibdat de Toledo, e puedan gozar e gozen de los preuillejos, e franquezas, e prerrogatiuas, e salarios que deuen auer por razon de los dichos sus ofiçios segund que las auedes vos los dichos jurados de la dicha

